

POSIZIONS

## I Ladins contra la Macroregion

*Per i doi president Antone Pollam dla Union Generela di Ladins dla Dolomites y Fernando Brunel dla Union de Fascia chesta idea met en pericul l'autonomia dl Trentin y ala despartesc ciamò de plu i Ladins*



*N desegn dla »Macroregione del Nord«zenza l Trentin Südtirol, da la plata Facebook con l medemo inom fata dl 2013.*

«I sfoes y i media à ti dis passés rejoné de n projet de Macroregion Nord Est porté dant tl Consei di Ministres dal Minister dles Regions Calderoli (Lega). Projet che é ence 'sponsorisé' dal President dla Provinzia de Trent Fugatti.

Al é n projet dassen pericolous per l'Autonomia Speziale dla Region Trentin Südtirol y souraldut per i Ladins.

I recordon che l president Fugatti é ence president dla Region y dl'Euregio Trentin-Südtirol y Tirol y che chesta proponeta à abù ofizialmenter l sech NO dl president Arno Kompatscher che à defenù l'Autonomia Speziale dl Südtirol.

Y i Ladins? Sce ala jissa inant de chest vers se descorissa i ladins dl Trentin y dl Venet ciamò plu despartis da chi dl Südtirol.

Y che dijei pa de chest i reprejentanc politics ladins che i on a Roma y a Trent? Al someia che i no daverje boccia.

Per chest conscidronse n doer, desche Union di Ladins, scrive y soscedé na discusion sun chest argomento emportant.

Nost Statut reiona de defendura dl Popul Ladin y de sté adum coi altri Ladins. Sce la Provinzia de Trent vegnissa tutta ite te chest projet, perdessela sia autonomia (perauter bele en pericul) y ence per

i Ladins de Fascia diventassela pioura.

A chest an jonta ite ence la situazion de nosc fredesc ladins de Souramont che dant da 15 agn, con n referendum, ài damané de ruvé adum con i altri ladins demé te una region, chela dl Trentin Südtirol.

L'Union Generela di Ladins dla Dolomites à te si programs chesta aisciuda n conveggn sun la despartizion di ladins steda dant da 100 agn y sun l davegni di Ladins. Al fossa debujegn che i reprejentanc politics y aministratifs de dut l raion olà che viv la popolazion ladina i tole dant chesta costion.

L'Union Generela é a la leta per ti sporje la documentazion che ala desclaresc les rejons de contra a la Macroregion, per ti dé maiour forza a la Region Trentin Südtirol con na vijion envers i obietives di Ladins y na colaborazion plu sterscia per arjonje i obietives comuns che revarda la scola, l'economia y c.i.

Al se trata de argomenc de gran emportanza che l'Union Generela vuel ti mete dant dampruma a la Lia di Comuns Ladins, con l obietif de na Comunanza Ladina adum tl contest dla Region Trentin Südtirol y dla Euregio Tirol.

*Antone Pollam, president dla Union Generela di Ladins dla Dolomites*

*Fernando Brunel, president dla Union di Ladins de Fascia*